

0 CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

JUL 29 1946

T 2252.8/1389

婺源沱川余氏族譜

在邑北九十里先世居下邳徙浙復遷之桐安宋有諱道潛者登
重和元年戊戌進主桐廬縣簿避睦寇于宣和二年庚子由桐
安來始遷居此 何七世曰宜高元至元壬辰領鄉薦爲江浙三
衢全川教諭終杭州路學正 八世曰蘇翁大德辛丑以明經舉
爲衢州路明政書院教諭 九世曰元啟至正己丑以明經舉爲
本州路明經書院山長歷池州路判 十一世曰公售有時望曰
公順明洪武丙子薦辟爲蘄黃使曰公藝有善行尤多濟利之功
十三世曰瑒以耆德屢舉鄉飲旌善人曰瑄弘治己酉鄉薦曰
瑒廩貢授松陽縣丞曰瑰以孫一龍贈布政通奉大夫 十四世

哈佛大學漢和
圖書館珍藏印

曰瑩弘治甲子鄉薦授廣昌縣令有政聲崇祀鄉賢名宦曰釗廩
貢授閔縣教諭曰耿郡庠生蚤卒妻吳氏奉 旨旌節曰燧事父
母竭忱孝視二寡嫂如母撫二孤姪如子人咸以孝友比于君陳
稱爲效陳先生曰時英以子一龍贈布政通奉大夫曰鏞嘉靖壬
午鄉薦授嚴州府判曰棐嘉靖丙戌會試亞元殿試傳臚授翰林
院庶吉士歷大理寺評事戊子主廣東試曰明徵山東阜城縣縣
丞曰榮嘉靖辛卯鄉薦授嘉興縣令 十五世曰準理學白衣崇
祀鄉賢奉 旨建坊勅旌賢孝曰壘以孫懋學贈通議大夫戶部
右侍郎兼都察院右僉都御史曰善廩貢授歸化縣令曰基英武
衛經歷有孝行崇祀鄉賢以孫懋衡贈通議大夫都察院左副都
御史曰默光祿寺署丞曰一龍嘉靖乙丑進士歷官太僕寺卿浙
江貴州四川三省祀名宦曰一鴻贛縣縣丞曰一鯤河南都司經
歷曰希傑廩貢授嘉祥縣教諭曰希亨以子純然封國子監學錄
曰瑩理學梅易山人 十六世曰世顯遼海衛經歷曰世儒稱神
童嘉靖甲午鄉薦歷官合州知州崇祀鄉賢名宦以子懋學贈通
議大夫戶部右侍郎兼都察院右僉都御史曰世寵光祿寺署丞
曰世榮廣東提舉階奉職大夫祀名宦曰世行南昌府經歷曰世
億成都主簿曰純華上杭縣丞遷 岷府典寶曰純照廩貢授諸
暨縣教諭曰純然嘉靖戊午鄉薦官兵部司務曰純質以子啓元
贈中憲大夫鴻臚寺卿曰世安以子懋衡贈通議大夫都察院左

副都御史曰國賓大田縣主簿曰躍淵行名世鰲永嘉縣丞十
七世曰懋學隆慶戊辰會魁贈工部尚書謚恭穆崇祀鄉賢名宦
曰啓元萬曆甲戌進士歷官大理寺正卿邑祀鄉賢曰懋進萬曆
丙子舉人曰懋衡萬曆壬辰進士吏部尚書謚文莊崇祀鄉賢名
宦持祀紫陽書院三賢祠曰懋孳萬曆甲辰進士歷官禮科給事
中崇祀鄉賢名宦曰懋年萬曆乙卯武魁曰紹祚天啟丁卯武舉
人曰懋哲南京中城兵馬司吏目曰邦彥府廩貢授甌寧縣訓導
曰邦耀貢士曰廷元廩貢隱居不仕曰懋交廩貢貴池縣訓導以
子自怡贈湘陰知縣 十八世曰懷悌貢元任武康知縣曰泰元
福州衛經歷曰康元俗州判轉荆門州判陞靖州同知曰昌祚廩
官生未出仕蚤卒曰昌稜頂補廩官生初授南京國子監典簿轉
江西經歷司知事陞陝西西安府通判陞江西廣信府同知曰鳴
雷郡庠廩膳國學廩官生學士謚曰章節曰自怡崇禎戊辰進士
歷官廣州府知府祀名宦曰元昌貢士選盱眙縣訓導未任卒曰
鳴成國子生以繼子維樞贈永年知縣 十九世曰垣行名維垣
內府中書科試中書舍人曰維樞 國朝順治庚寅拔貢授永年
縣知縣補臨縣知縣兩邑祀名宦內召兵部職方司督捕主事曰
振鴻由拔貢教習授浙江杭州左衛經歷陞北直順德府沙河縣
知縣曰振球拔貢授霍山縣教諭曰文淑行名振淑拔貢授山西
襄縣縣丞曰果廩貢考授訓導曰斯颺監生考選州同知 二十

世曰光魯拔貢初授廣東高州府化州石城縣知縣補任福建建寧府建安縣知縣又補任四川叙州府富順縣知縣曰擴廩膳生例貢考選訓導曰光耿拔貢考授州同知康熙乙酉科江南鄉試中式第二十名舉人

沱川余氏派衍源流

始遷沱川之祖諱道潛府君字希隱號東窓登宋重和戊戌進士授桐廬縣簿宣和二年庚子避睦寇方臘亂由桐安遷此居焉生子曰翫世字宗元行宗三號碧溪翁宗三生子二長曰詵成字君弼行君六次曰詡成世字君輔行君九君六之後散遷淮西黃岡君九公生子二長曰小四世次曰小九小九諱全字信仲官評事其後不傳小四公諱誠字端仲舊譜書小四朝散號沱峯耕隱生子四長曰子勝字世華行百三次曰子聰字世傑行百七又次曰子強字世雄行百九又次曰子法世字世則行百十二百三生子六宏枝居篁村古林餘傳未詳而百七百九所居世系難考其實

百十二公號中山耕叟生子三曰上舍世諱德忱行千九曰招撫
諱德讓行泰一曰己翁諱德潤行泰二招撫不傳己翁授宣州路
教諭子孫散居清華甲路本邑東門上舍公字忱叔號東軒籍為
金戶初授都官職轉為國學上舍咸淳年間由篁村始分居鄞村
生子宜高世字維甫號鼎峯行宜一昔人作詩美其才曰沱川余
維尚聲名揚四方不殊曹子建七步能成章元至元壬辰與休寧
夏景端同領鄉薦為江浙三衢金川教諭遷杭州路學正生子二
曰蘇翁世字伯吳行補一曰萊翁字伯東行補二補二生三子兆
生字德威兆從字德高福生字德基德基子以德其後未詳德威
子以谷行祥二居理源上彎庄背德高子以順行祥三居燕山水
西補一公號三溪學業廣博大德五年授衢州路明政書院教諭
生子三曰元啟世行震一曰元善行震四曰元濟行震七震七不
傳震四公諱慶坦號梅齋自鄞村徙居燕山生子三曰以亮字晞
陽曰以清字貴陽曰以道字志陽晞陽志陽子孫散而居之貴陽
生子五曰公遠曰公藝曰公先曰公大曰公禮此乃燕山一門之
五大房也震一公諱震祖字元啟以字行號仁齋以學問鳴于世
至正九年授本州路明經書院山長知州白公讓薦陞池州路判
學者稱仁齋先生生子二曰以明字昭陽曰以和世字景陽昭陽
行閏三尚居鄞村故居生子曰公售字德瞬生子四曰良善曰良
銑曰良著曰良達此又鄞村一門之四大房也景陽公號鈍齋行

閔五自鄆村遷居理源生子曰公順字德從號竹隱大明洪武
二十九年以人材薦辟為蘄黃使出差吉安府體勤胡惟庸黨還
朝復命疏乞歸養生子二曰定富字良實曰定廣字良大此為
理源一門之上下房也今統鄆村理源燕山通稱之曰三門余氏
焉夫自始遷祖以上莫能考其世次不敢妄為牽合而傳自沱川
派衍三門九十二世得以詳其世系而實紀之

沱川余氏宗支歌

東窓公字希隱諱道潛始自桐安遷沱川生子一人名曰翫二世
祖宗字宗元詵成詡成是其傳詵成五子皆遷徙曾無一人守故
園三世詡成字君輔當年生子誠與全全行小九無後焉小四誠
公澤餘餘所生四子盡豪賢子勝世華石三翁篁村古林是大宗
百七世傑名子聰百九子強字世雄聰強世次俱無據居川內者
稱附庸百十二公字世則三門支派公發脉五世子法是本宗生
子三人始分析德忱德讓與德潤長為上舍家聲振德讓招撫艱
嗣胤德潤已翁支可認德忱稱為上舍公分居鄆村川之東是為
太宗六世祖生子宜高字維甫鄉薦起家官掌正鼎峯遺集傳來

古七世宜一生蘓萊萊翁豈及蘓翁哉補一教諭八世祖三門派
自三溪來萊翁有梓兩枝齊附居莊背瀛水西何如鼎望三門族
本系教諭號三溪三溪教諭三男子長男震一字元起中男震四
字元善少男震七字元濟震七元濟後不傳震四元善燕山遷震
一山長兩門祖晚築仁齋於理源燕山震四號梅齋晞貴志陽三
子排志陽之後居星敬晞陽之後亦非儕惟有貴陽發早梅晞陽
志陽少栽培中枝獨向燕山門花開五出占春魁仁齋山長生八
陽昭陽景陽世綿長鄣村並茂稱四良理源分為上下房昭陽閨
三字以明世居鄣村善守成以明生子曰公售售生四良齊發榮
景陽閨五以和公居定宅理源中薦辟人材公順公良實良大
兩房分良大行二定廣公三子號曰梅竹松倚歟盛哉梅竹松宗
支歌兮一曲終

三派同源三溪裔始祖迄陽十世繼十分傳百百分千子孫繩繩
兮傳萬世

名賢賡起理源歌理源仁里號鳴珂恭穆文莊聯萼顯冬卿天卿
名賢多廣昌名宦鄉賢祀合州諫議相繼起三代名賢美四公祖
孫兄弟父與子都憲洙源孝瞽宗文莊冢宰乃文孫職方兩邑祀
名宦更兼賢孝友弟昆勅旌賢孝有余準白衣崇祀真高品廣
東提舉名宦祠廣州刺史祀同省一門四世節孝奇奉旨建坊
旌表之難數孝廉歲貢士府尹邑宰印纍纍

鄧村同系山長族。翹自上舍始營卜。名取鄧村其義何。開門便見鄧山麓。率湖年少早登科。官由教諭遷學錄。貶恩封父如其官。陞轉北兵部司務。大理正卿號大鄧。九十一齡斯全福。沒祀本邑鄉賢祠。至今俎豆猶芳馥。

燕山同系三溪譜。孝廉開先自崇古。弘治癸丑空登第。一榜盡黜唐伯虎。州判景宣號古城。應天中式十一名。官居浙江嚴州判。致仕歸來兩袖清。太僕同鄉虎兒田。歷官布政在四川。武侯文翁坊建造。考滿兩世五花聯。功臣名宦人所仰。浙蜀貴皆祀之焉。篁村同系小四公。評事子忱號率峯。與烏五人稱奇童。會試亞元傳臚貴。翰林庶吉士階崇。戊子欽典試廣東。有才無壽三十終。

厥弟子儀號高湖。辛卯鄉科又遭逢。武康嘉興兩作宰。歸來捐金賑歲凶。享年八十有二歲。木出沱川之九家。沱川先達名賢譜。前朝濟濟難全數。記得理源居大半。兩家奕世聯簪組。聊作是歌為闡揚。詳明繼述後賢補。

理源松房世序詩 白如遷所希隱公至友松公凡十三世

和隱宗元君輔公小四都官上舍同宜一補一从震一以和人材良大松

[Faint bleed-through text from the reverse side of the page]

忠貞堂本系祖德頌

繫我迪功開鴻濛宗三塗既勤坦埔君九克成
松葉隆穆朝散性寬
洪世則捐軀義是從上金肇其川之東學正經明薦辟雍教諭自號三
溪翁山長俎豆並雲臺以和定
源中奉使令德孝與忠侗儻好義
良大公作廟翼思友松效陳有古君陳風孝哉都憲祀瞽宗中丞疏
草動鄒馮於皇家宰德言功章節越封篤孝恭司馬承祧產辭豐末孫
光詔頌無窮

沱川余氏世紀

賜進士嘉議大夫總督糧儲南京工部侍郎兼都察院右都御史裔孫懋學著
二十世理源裔孫光詔輯

祖德小傳

始遷祖希隱公

始遷府君諱道潛字希隱號東窓宋重和戊戌王昂榜進士授桐廬縣主簿有德政居二年方臘亂封源洞遂棄官還新安避地婺源之沱川居焉是為沱川始遷之祖卒塋篁竹均配張孺人塋春子塢載府縣兩志寓賢傳按嚴志載府君博極群書精於天文地之術為政精密嚴恕與民興利除害民甚德之時朱勗採奇花異石以供貢獻將次桐廬公

曰吾豈剥民以媚權貴乎吾不去終必有禍遂挈妻子去之婺源不逾
年方臘果起兵以誅勛為名人始服公之先見府君之遷舊傳避方臘
之亂茲云避朱勛之禍未知孰是要之令德宜民垂裕後昆公實錄也
贊曰釋褐迪功是曰能仕見幾桐廬是曰能止於焉素心於焉暖喜
昔兮一身今兮萬指有鬱松楸有嚴滌瀝於萬斯年乃公之祉

始遷一世祖希隱府君事實

府君諱道潛字希隱號東窓博學廣知年十二與同隊遊見博奕輒
唾罵料事聰察如老成人及冠肄場屋業宋徽宗重和元年戊戌登王
昂榜進士第授迪功郎為桐廬縣令為政寬恕惠澤及人一方黎庶咸
愛戴之宣和二年庚子值睦賊方臘亂遂不願仕慨然有離世樂道之
心即日解官微服還新安携家避地居星源之沱川優游泮渙以終餘
年卒塋川西篁竹均雙馬飲泉形吸波穴亥山丙向配夫人張氏有淑
德勤于麻苧畧沙書史訓子有方卒年八十塋春子塢獅子伏塔形庚
山甲向子一人右翫

余道潜字希隱宋雍熙進士智孫舒城宰永錫子登宋重和元年王昂榜進士任桐廬王簿博極群書精于天文地理之術為政精密嚴怒民甚德之時朱劭採奇花異石以供貢獻將次桐廬道潜曰吾豈利民以媚權貴乎不去終必有禍遂擊妻子之罄源未踰年方臘果起兵以誅劭為名浙東西遂大亂人始服公之先見云

宋桐廬縣簿希隱朱公像贊

精神秋水也瑩徹清淑心兮開豁也江淮濟濟臨以事君也誠一不欺勤以撫下也分毫不苟噫宜其有德光于前至今後裔而亦能固守宣教郎直徽猷閣主管台州崇道觀邑人朱熹拜書

余氏始祖宋進士廷功郎希隱公墓禁碑

此余氏始祖佳城也。體魄所藏子孫世世保。乃支下無知者不思孝敬。妄意侵祖近墳。左右挖掘。毀慎葬其近親而忘近親所自出之祖。不但陷身不孝。抑且陷親無禮。大義何居。法當呈究。姑念愚蠢。責令遷改。外合立禁碑。做後凡近塋龍脉頂脊及塋左右。參丈內俱不許子孫侵葬。犯者祠內鳴鑼。邀集子姓。公同起徙。仍以不孝呈治。其異姓有犯。公同聲罪。斷不姑息。水有源。木有本。不念源本。非人也。支下子孫。其凜凜哉。此示。

大明萬曆甲寅三月十九日余氏宗祠立石

十七世孫南京鴻臚寺卿啓元

大理寺右寺丞懋衡

禮科給事中懋孳同立

希隱公墓左右二邊禁碑

近祖塋右邊左邊各丈內子孫亦不許侵葬犯者以不孝論異姓有犯公同
聲罪

萬曆甲寅三月十九日余氏宗祠立石

十七世孫南京鴻臚寺卿啓元

大理寺右寺丞懋衡

禮科給事中懋孳同立

余氏始妣孺人張氏墓禁碑

近瑩龍脉頂脊及瑩左右前禁步內子孫永不許侵葬犯者以不孝論
異姓有犯公同聲罪

萬曆四十二年三月吉日余氏宗祠立石

十七世孫南京鳴臚寺卿啟元

大理寺右寺丞懋衡

禮科給事中懋孳同立

二世祖宗元公小傳

宗三府君諱翫字宗元號憩溪翁又號湖山道人卒塋五保高段配黃
孺人塋黃村上灣梅樹下今所謂塚林下是也為余平族鱣基屋侵踞
僅一坏耳按舊譜載府君之言曰隱居以求其志行義以達其道者伊
尹之流也吾無能焉子真之耕谷口龐公之居鹿門二子之志我則行
之遂隱不仕此脩譜者考求府君事實不得而為是影響之言以愚後
裔者也余不敢傳

贊曰矯矯桐廬爰及胥宇爾其陳脩爾其饁畝始遷之難是父是子
業雖未詳德則可紀

二世祖宗二府君事實

府君諱翫字宗元號瑄溪公行宗三嘗自誦曰隱居以求其志行義以
達其道者伊尹之流也吾無能焉子真之耕谷口龐公之居鹿門二子
之志我則行之遂隱不仕又自號湖山逸士卒塋本里五保高段坤山
良向配孺人黃氏塋黃村上壩梅樹下壬山丙向有子二人誥成詡成

三世祖君諱公小傳

君九府君諱詡成字君輔。宅。莖。等。竹。坵。配。程。得。人。卒。葬。程。家。壙。弔。鐘。垓。
按舊譜載府君承先人之業已成之業尤善生殖嘗曰積而能散古之道也
於是歲計所入以充伏臘賓客昏姻喪葬之需有餘以周鄰里之匱乏
若人咸德之此亦模似之語不敢以傳

贊曰。伯也遷只仲也寧只三世相承特立不倚彥可式閭城可重鄙
誰謂寄火而成仁里

三世祖君輔府君行實

府君諱詡成字君輔行君之自少知識不允至此君已成之業尤善克
拓貲產倍常嘗曰積而能散古之道也于是計歲所入以充伏臘賓客
之需及婚姻喪葬所費有餘則周里之貧不能給者人咸德之卒葬川
西筓竹均坤山良向配孺人張氏程葬程家灣吊鐘坡下山癸向子二人
長曰誠次曰全

余氏第三世祖君輔公墓禁碑

近塋龍脉頂脊及塋上石前禁步內子孫永不許侵葬犯者以不孝論
異姓有犯公同聲罪

萬曆四十二年三月吉日余氏宗祠立石

十五世孫南京鴻臚寺卿啓元

大理寺右寺丞懋衡

禮部給事中懋學同立

余氏第...世祖妣孺人張氏墓禁碑
近塋龍脉頂脊及塋左右前禁步內子孫永不許侵葬犯者以不孝論
異姓有犯公同聲罪

萬曆四十二年三月吉日余氏宗祠立石

十五世孫南京鴻臚寺卿啟元

大理寺右寺丞懋衡

禮科給事中 懋孳同立

四世祖小四公小傳

小四府君諱誠字端仲號范峯耕隱宋紹興十九年己巳三月十三日
生嘉定元年戊辰四月三十日歿葬黃村瓦塢塢配汪孺人生卒無攷
葬同處青龍頭存君墓為燕山子姓侵耐子四人子勝子聰子強子法
按舊譜載府君之言曰黃憲度量汪汪若千頃波古今以為美談吾雖
不敏志竊慕之此亦模似之語不敢以傳又按府君嘗有譜圖序文書
宋淳熙十一年玄默困敦而中言襄公靖衛公深等仕宋為顯官似易
世而追述者且攷淳熙十二年為乙巳惟淳佑十二年方為壬子然府
君已於戊辰先歿其為贗作無疑文贗則所序之圖亦贗矣

贊曰九矣

圖雅承先懿惟公有言譜惟實記罔以顯援罔因賤置

曲江傳疑公之志

四世祖小四

行實

府君諱誠字端仲號世多耕隱行小四性質實樂恬靜不尚浮華人或
犯之恬不與校鄉稱善人嘗謂人曰昔黃憲度量汪汪若干頃波古今
以為美談吾雖不敏志有慕焉宋高宗紹興己巳三月十三日生寧宗
嘉定戊辰四月三十日卒壽六十塋本里黃村瓦埭塢寶劍出匣形七
星穴屯兵案又號數錢下櫃形癸山丁向雙溪王炎銘其墓曰嘉穀種
兮苗生秀而實兮豐盈彼美人兮明德維馨善積于衷兮慶及雲仍配
孺人汪氏坤德柔和克勤內助婦道母儀裕如也卒塋同處青龍頭折
股金釵形粧臺案丑山未向子四人子勝子聰子強子法

小四朝散余公墓誌銘

嘉定啟元余歸自臨安暇日著書于雙溪之書樓適友人余世華氏踵門頓首再拜而告曰孤不幸先人棄背幾三閱月將以是秋庚午吉日奉柩窆于舊居之側而墓石之文未有能銘者孤恐先人之德沒世無聞是懼側聞使君錦歸立言信後無二敢請賜之銘發先人之潛德以寵其沒浮先人之死猶不死也因泣下再拜固請辭不獲按狀余氏之先出秦由余之後世居新安為邵著姓至唐有名復者廣明間自歛黃墩徙居東陽四傳有名宏達者由浙東監察御史陞朝散大夫知安慶桐城晚年謝事又自東陽遷居桐安其後有名希隱者為桐廬簿值方臘亂棄官微服居新安避于星源之沱川沱川之有余自希隱公始耕隱

則希隱公之曰孫父諱詡成大父諱翫是為耕隱世系之大畧也耕隱
性質實樂恬靜不尚浮華人或犯之恬不與校鄉稱善人紹興十九年
己巳三月三日生嘉定元年戊辰四月三十日卒配汪氏坤德柔克
勤內助婦道母儀裕如也有子四人世華世傑世雄世則孫男十人曾
孫男二十有七人皆英傑穎異耕隱積善有素宜銘銘曰嘉穀種兮苗
生秀而實兮豐盈彼美人兮明德維馨善積于衷兮慶及雲仍是歲己
巳孟秋上澣吉日朝議大夫婺源縣開國男食邑三百戶 賜金紫魚
袋同邑人雙溪王炎晦叔撰

五世祖百十二公小傳

都官府君諱子法字世則行百十二號中山耕叟卒塋南源古樓垓府
君存日用術者言卜壽藏于茲荆庵以奉香火名曰敬本子孫捐畝祝
僧焚脩後人遂因曰南源庵云配李孺人系出休寧汪村卒塋充頭鎖
銅山下坦按上舍府君析產序云先人先妣平昔以樽節立規模以勤
儉為身法衣大布食粗糲因前人所遺一綫從而增置星粟田山真所
謂銖寸積累并合起家者又云外患方紓內難繼作頓有一種弗義族
甘心屈節權門致先子為義受辱丁卯秋而妣氏不療逮九月而考氏
抱憾卒于江左此實錄也而舊譜乃云不求聞達手不釋卷鴻達碩彥
過之則具茗次相與款曲譚笑終日意豁如也咸勸之仕則曰與其簪

笏之榮身孰不貧賤之肆志鑿空撰構於上舍府君所序云云一不之
及彼蓋徒知浮談之為足夸而不知樽節勤儉大布麤糲數語有書無
逸詩幽風景象所謂小人之依以艱難得之者也余故備述之以見祖
宗積累之難後之人其無曰昔之人無聞知

贊曰徒寸累銖食粗衣布緊用之饒而族之妒飲憾江左終天曷顯
公祚綿綿作善靡斁

五世祖百十二府君行實

府君諱子法字世則行百十二宋光宗紹熙辛亥生自少卓立志與眾
殊養浩山林不求聞達性嗜書手不釋卷鴻儒碩彥過之則相與欵曲
具茗飲終日笑談意豁如也人或勸之仕則曰雖然簪笏之榮身孰若
貧賤之肆志遂隱耕于沱之中山因自號曰中山耕叟因弗義族甘心
屈節權門府君為義受辱而抱恨卒于江左迺宋度宗咸淳丁卯九月
也諸子奉府君柩還葬本里南源庵即古樓垓猛虎出林形堆肉案庚
山甲向同郡万伯華銘其墓曰繫士生兮穹壤間惟出與處而已出者
得其時行其道顯于世也處者時弗遇道弗行則隱以終身是則隱顯
雖殊而其為一則一古人所謂處畎畝之中而樂堯舜之道者其中山

耕隱之謂乎。孺人李氏有淑德。咸淳丁卯秋卒。塋本里三保充頭鎖
筒山裏下坦。辛山乙向。子三人。德忱。德謙。德潤。

世則余公墓文

余公諱子法。字世則。行百六。二世居婺源之北鄉大安里。其先有名希
隱公者。自桐安徙居沱川。越四葉。至世則。父諱誠。大父諱詡。成。曾大父
諱翫。世以殷富相承。田連阡陌。稅貫甲于北鄉。自少卓立志。與衆殊。養
浩山林。不求聞達。性嗜書。手不釋卷。鴻儒碩彥。過之則相與款曲談論。
古今品題人物。終日嬉怡。意豁如也。或勸之仕。則曰。雖然。簪笏之榮。身
孰若貧賤之肆志。遂耕隱于沱之中山。因自號曰中山耕叟。卒塋里之
五保古樓坡。庚山甲向。孺人李氏有淑德。子三人。名德忱。德謙。德潤。一
日衰經踵。余讀書之所。且拜且泣。告曰。孤不幸。先人已棄。抱風木之悲。
動終天之痛。以是月庚寅之吉。以奉襄事。惟夫子賜之。文刻于塚上。

俾先人之德不朽則誠幸。辭弗獲按狀。電與之。文曰。蔡士生。字。壞。間。惟。出。與。處。而。已。出。者。得。其。時。行。其。道。顯。于。世。也。處。者。時。弗。遇。道。弗。行。則。隱。以。終。身。是。則。隱。顯。雖。殊。而。其。為。道。則。一。古。人。所。謂。處。畝。之。中。而。樂。堯。舜。之。道。者。其。中。山。耕。叟。之。謂。乎。皇。元。至。元。十。六。年。已。卯。七。月。既。望。同。鄉。儒。士。方。伯。華。叔。父。撰。之。樂。文。

六世祖上舍公小傳

上舍府君諱德忱字忱叔行千九始府君兄弟三人析產以祖居查坦為一分鄆村新居為一分其無居者以川中上田二十畝及大小牛欄塢山木為一分府君闔得新居遂徙居焉號東軒年九十卒葬戴相塢大圓坦配張孺人塋克頭水視塢舊譜載府君博覽經史事蹟見遺文而遺文僅見前序別無可攷弟德謙以賢雄一鄉居祖居德潤嘗脩譜牒始居南源庵後徙小沱外村云

贊曰既廩單雀亦艱萃榛金戶勝國寔為膽薪仲也餒而叔也指數惟公克昌是繁有屬公事見文公文無討祀宋不徵我後之咎

六世祖上舍府君行實

府君諱德忱字忱叔號東軒行千九宋寧宗嘉定壬午生資質出倫博
通經史善屬文且富而好禮邑大夫雅重之籍為金戶初授都官職轉
遷上舍值宋季即營分居川東鄞村自娛不仕元仁宗皇慶壬子卒享
年九十有一塋本里戴相塢口東邊乾山巽向加亥巳過山虎形猪羊
案艮水來丁水去配夫人張氏塋本里充頭水規塢口坤山艮向子一
人宜高

千九上舍公兄弟關帳序

婺源縣澗源鄉大安里余都官即上舍也父子法親生三男長男德忱
次男德謙三男德潤今德忱兄弟不幸父母俱喪三年服闋合將先父
存日置列田山屋業池塘莊宇雜產作孟仲季字號探每作三服均分
且德忱嘗聞先輩有言創業難守成亦難創業之所以難者以其備歷
險阻躬履勤儉而後得此業也守成之所以難者亦必熟知前人險阻
之狀恪守勤儉之規而後業可保耳先人先妣平昔以樽節立規模勤
苦為身法衣大布食粗糲因前人所遺一綫生意從而增置星粟真所
謂銖寸積累升合起家者也奈何財為怨府貪夫計生中遭外侮交攻
群黠競起相與較尺寸于百戰之餘辨曲直于萬六之口鹿僅不死人

手則尊長之業可謂勞且難矣。則外患方紆，內難繼作，頌產一種弗
義族甘心屈節權門，致先子為義受辱。丁卯秋而妣氏不療，逮九月而
考氏抱恨終于江左，曾不得少享壽康之樂。以為劬勞之報，為人子者
可不痛哉！德忱分偶，居長生際，時多艱，在髫鬣已目擊考妣之勞，年纔
志學，又被驅于對訟之列，排難解紛，奔走禦侮，于今亦二紀矣。方茲墨
制已終，思念大恩未酬，甚欲與為同籍之舉，但二弟以生齒既蕃，則利
害不一，有不可復合者。今集眾立議，闕帳情愿，析業謹以公堂，不腆之
田與二弟剖而食之，并述前人艱難之梗槩于篇首，于以發同氣之深
思。若夫創業之難，前人已履之矣。至守成之難，方當與二弟從事于此。
辛望仰體前人辛勤起家之意，各謀所以報親之道，庶無愧于善繼志。

善述事之孝云

宋咸淳七年庚午七月

日承分仲字號闕帳

七世祖學正公小傳

學正府君諱宜高字維禹號鼎峯行宜一以鄉薦為江浙金川教諭遷杭州路學正卒塋上舍府君穴左配江孺人系出旃坑卒塋裏坑口東邊舊譜載府君為文操筆立就有遺稿一卷曰鼎峯集遺稿雖未得見然曰鄉薦曰學正則余宗文學之盛寔自府君始矣

贊曰累世抱璞自公席珍累世獨善惟公作人高風若覩遺種在陳懿哉前文肇我彬彬

七世祖宜一府君行實

府君諱宜高字維甫號鴻峯行宜一宋理宗寶佑甲寅生性純孝人品超卓表表然如鶴立鷄群讀書為文而宗韓柳賦詩而宗李杜下筆滔滔若長江巨浪無少凝滯數百千言頃刻立就邑人作詩美之曰沱川余維甫聲名揚四方不殊曹子建七步能成章元至元二十九年壬辰與休寧夏景端同領鄉薦為江浙三衢金川教諭終杭州路學正廉介自持每飭士子以脩身慎行束人心以禮義廉耻為先府君之才雖未盡于用而澤亦至于大及天下然而以德自重談論不苟于言笑交際不苟于取與雖燕居獨處其衣冠瞻視必尊必嚴遇交際賓客雖造次顛沛不違乎禮節為文章不苟于字畫皆足以警世範俗有文集十卷

曰昂峯遺稿元成宗大德壬寅卒。葬戴相塢東。遺即附考君上舍翁。穴側配夫人江氏諱足。同邑旃坑人。懿行柔恭。沒葬三保理源口東邊。寅山申向。子三人。蘇翁萊翁茶翁。

八世祖教諭公小傳

教諭府君諱蘇翁字伯吳號三溪行補一先大夫撰府君墓記云與弟補二萊翁伯東頗有文學邑儒江古脩先生母族也雅器重之大德五年辛丑任衢州路明政書院教諭至順元年庚午七月十八日卒于家距生至元庚辰二月二十四日得年五十有一配孺人汪氏賢而艱息納里之程氏二女長諱弟生子一曰元啟行震一次諱未生子二曰元善行震四曰元濟行震七震七後再世不傳而震一派復分為二居鄞村者曰昭陽吾理源者曰景陽震四派復分為三曰晞陽曰貴陽曰志陽自震四公已徙燕山而志陽尚居鄞村下屋蓋至于今統補一府君之派通稱三門余氏蓋嘉靖丙辰脩墓時作也府君墓在鄞村後山以

長程孺人初汪孺人齋出休寧汪村生元至元辛卯二月十五日歿至
正丙戌八月初一日墓在九保水路墩開以事往田家得病不起遂藁
葬焉小程孺人別葬枚坑

贊曰學殖紹聞青蓮續緒爰惠抱凋爰輯螽羽惟公惟孺篤天之祉
振振三門遐念爾祖

八世祖補一府君行實

府君諱蘇翁字伯吳號三溪行補一鼎峯翁之長子也元世祖至元庚
辰二月二十四日子時生自少聰敏負德器為文章如菽粟布帛皆有
關於世教成宗大德辛丑任衢州路明政書院教諭循善誘啟迪良
多致仕歸鄉不以富貴貧賤為敬嫚容不以賢不肖而輕出毀譽語文
宗至順庚午七月十八日卯時卒葬本里鄣村後山甲山庚向配夫人
汪氏諱若蘭出休寧三十二都汪村汪清公女有賢德元世祖至元己
卯二月十五日午時生順帝至正丙戌八月初一日午時歿葬本都九
保水路墩蛇形坤山艮向側室二俱出同里充下程觀護女程氏諱弟
沒葬府君穴側子一人元啟程氏諱未沒葬本里鄣村其墓內改葬枚

坑胡家住後天眠形甲山庚向子二人元善元濟

[Faint bleed-through text from the reverse side of the page, including characters like '山', '庚', '向', '子', '二', '人', '元', '善', '元', '濟']

補一公任浙江衢州路教諭劄付

皇帝聖旨裏江浙等處儒學提舉司今擬余蘇翁充衢州路明政書院
小教諭勾當所有付身須議出給者

付余蘇翁准此

大德五年 月 日

大德五年 月 日

祭兄補一公文

嗚呼吾兄長弟七歲五十有奇何遽傾逝惟兄與弟如手如足少本同根長寧異情自吾父去世時兄年二十有三弟方十六弟雖未克承家兄子應門則有練熟尚幸祖與祖妣在堂而母氏在均于垂裕而撫鞠如是者十年二親又繼以亡九與弟皆有室有子蕃且茂矣乃始析業爰異厥居弟多坦率兄實友于滿謂各臻眉壽九老之如歲時燕叙白首無渝孰謂兄遽去弟而大夢之歸耶前月旦日宿筵勸酬兄飲且樂疊鼓歌謳雖日小有疥楚而言笑自若弟亦未始以為憂也豈惟竟以是疾其不瘳耶永訣有懷欲言輒止嗚呼哀哉弟知之矣上有祖父之喪猶在淺土下有弱女幼男未畢婚娶是二者兄之所深慮也雖然祖

父之喪弟能襄事男女婚娶則有嫂氏之賢明姻族之敦叙必能如尊
志也况兄長子亦既有孫稱家襲美足慰人心所有憾者吾父逝世不
滿五旬今也吾兄踰五望六復不滿焉是天之不仁而嗇兄以永年也
顧弟之星運行近五十申土月互纏則修短亦未可覘也雖幽明之少
異又幾何而不為兄之從舉觴再拜泣血填胸惋音容之如在言有盡
而意無窮

弟萊翁奠

元衢州路明政書院教諭補一府君墓記

九世孫世儒

余之族于沱川者自宋進士桐廬簿諱道潛府君避睦寇于宣和庚子
始來居此蓋越四傳而百三百九百十二之派分焉百十二公諱
子法勝國時都官一傳而上舍招撫已翁之派分焉上舍公諱德忱籍
為金戶始居川東鄞村蓋一傳而為杭州路學正鼎峰先生宜高又一
傳而補一補二之派分焉補一府君諱蘓翁字伯吳與弟萊翁伯東並
有文譽邑儒江古修先生母族也雅器重之天德五年辛丑任衢州路
明政書院教諭至順元年庚午七月十八日卒于家距生至元十七年
庚辰二月二十四日得年五十有一配孺人汪氏賢而艱息納里之程
氏二女長諱弟生子一曰元啟行震一明經書院山長與胡雲峰先生

上下其議論知州白公薦之擢池州路通判學者稱仁齋先生次諱未生子二曰元善行震四曰元濟行震七震七後再世不傳而震一派復分為二居鄆村者曰昭陽居理源者曰景陽震四派復分為三曰晞陽曰貴陽曰志陽自震四公已徙燕山而志陽尚居鄆村下屋蓋至于今統補一府君之裔通稱三門余氏子姓不下七千餘指鄆村乃故居也府君之塋寔在後山面庚負甲世遠易忘人蕃易渙宅適易犯荆棘莽然堂封就崩一抔之外鞠為蔬圃每歲清明雲集輿嗟然猶諉之曰罔非祖徯其疇與任然而獨勞乎則漫尋故事懸楮錢以去迺嘉靖丙辰復屆是日天祐我宗祖啟我東鳩工甃石僉議攸同夷者以宗穢者以祛侵者以歸同以甄垣廣二丈袤四丈五尺蓋六世孫時霓寔倡之六世孫鑰時登七世孫竣塋寔董之凡八閱月而竣事謂九世孫世儒曰不可以弗識也小子識之嗟乎古不修墓慎終也虞遠也勿之有悔焉爾也雖然自孔子于防而或不免焉碩茲二百二十有七年間逾兵歷燹陵谷變遷神呵鬼護荒壠僅存其墮焉以至于斯可惻也其猶得按遺跡循故事以俟于斯不可謂匪幸也其忍睨焉于其墮而不修乎自墟墓而推之則祠字可念矣自覆轍而鑒之則嗣守可虔矣凡同功于茲役同事于展掃者其初孰匪一人之身乎又即所謂一人之身世旁而下上之凡若干派若干人其初又孰匪一人之身乎夫自一人之身而至于為途人為秦越者弗思也思則有所不忍矣擴而充之仁不可勝用是故以修墓之心修其身則家可教人親長而天下平于

元宗手何有是為記

元衢州臥明政書院教諭補一府君墓記事畧

府君諱蘓翁字伯吳號三溪行補一我余氏先世居下邳東漢末渡江而南至唐廣明間諱元復者由國子生歷職郎署任比部員外自歛黃墩徙居東陽傳四世至宋初有諱知者由荆東監察御史陞朝散大夫再自東陽徙居同安知生子一諱永錫為舒城宰永錫生子三長諱道澤世居同安次諱道潛宋重和戊戌登王昂榜進士第授迪功郎為桐廬縣主簿宣和二年庚子值睦寇方臘亂即日解官還新安樂婺源沱川之勝家焉又次諱道濟譜載遷饒州芝山桐廬簿生子一諱翫翫生子二長諱詵成遷黃岡次諱詡成詡成生子一諱誠誠生子四季諱子法歷四世俱隱居不仕子法生子三長諱德忱富而好禮邑大夫雅重

之籍為金口。初授都官職轉遷上舍。值宋季即營分居川東鄆村自娛。亦不仕。生子一諱宜高。以文學鳴于世。元世祖至元壬辰與休寧夏景端同領鄉薦。為江荆三衢金川教諭。終杭州路學正。即府君之考也。母夫人汪氏諱足。同邑慈坑人。懿行柔恭。生子二長。即府君。次諱萊翁。字伯東。府君自少聰敏。負德器。為文章如菽粟布帛。皆有關于世教。母族同邑江雪砭。愷江事天。潤身江古脩。肅叔侄皆一時聞人。每慎許可。獨愛重府君兄弟。府君以通家好為道誼交。元大德五年辛丑任衢州路明政書院教諭。循善誘。啟迪良多。致仕歸。不以富貴賤貧為敬慢。容不以賢不肖而輕出毀譽語。至順元年庚午七月十八日卯時沒于正寢。葬本居鄆村後山。負甲面庚。距生至元十七年庚辰二月二十四日。

子時享年五十有一。配夫人汪氏諱若蘭。出休寧三十二都汪村。汪清公女。存有賢德。不惟克相府君。以綜家政。因自艱于嗣。亟擇同里程氏子觀護。二女姊妹二人為側室。姊氏諱弟生子一諱元啟。號仁齋。嘗主教明經書院。與宿儒胡雲峯上下其議論。學者翕然宗之。本州白公讓諡其賢薦之。陞池州路判。後姊氏之歿也。即附府君墓。側妹氏諱未生子。二諱元善。號梅齋。諱元濟。號怒齋。皆隱居不仕。自是怒齋翁後二世不傳。而仁齋翁梅齋翁二派子孫分居川東。由三溪而燕山。而理源奕奕繁衍。積久彌盛。傳歷世儒。止距府君九世矣。距府君之葬二百二十有七年。于今矣。是歲丙辰清明之節。舉行祭禮。既畢。迺齊詣先塋。拜掃。至見元隴變為園圃。墳塋日以傾沒。林楊悽愴之心。油然而興。有六世

孫曰時霓亟率少長白諸族老倡議修葺之舉即日戒成六世孫曰鑰
曰時登七世孫曰坡曰塢鳩工董事去荒穢闢墓北伐石築結構以磚
垣計周圍十一丈有奇計費金若干兩訖事咸謂不可無述以詔來者
噫府忌為我川東統派之祖子孫今不下七千餘指顧其北域乃守奉
弗虔廢墜如此豈非嗣世者之責歟茲敬礮石墓上追紀其世次履歷
之詳并今日修葺之典俾後來者相與謹之而密瀟湫者尤當加勉以
毋自陷于不孝之罪云

八世孫世儒

衢州路孝諭夫人余母汪太君墓表

夫人諱若蘭字閨隱星源沱川教諭余公伯吳之妻也姓汪氏歿葬于
里之水路墩有年其孤震祖以塋日嚴未暇銘壙泣血不遠百里而來
具狀請文表其墓且曰某之家君與先生締交有素先君歿後三喪淺
土未克襄事先母承先君遺命謀置塋所其辛勤萬狀始遂厥前思非
先生之文彰其懿德則先母之行默々無聞于後誠得一言以寵綏之
孤之幸也按狀孺人之先出自唐越國公汪華之後派傳九若干代世
居休寧之西鄉汪村父諱清祖諱革曾祖諱文質世以隱德相承而積
善有素孺人濡厥先美綽著德容及笄歸于余氏之門事舅姑甚得婦
道妯娌之間怡々愉々庭無間語其事上也律已以敬其御下也養之

以恩內無妬忌之私外有恭順之節相其君子義重唱隨至于妾媵咸
得其歡心良人恢拓基業而孺人伙助居多不幸先卒孺人撫諸孤恩
愛備至若舅姑之喪曾祖之祀未克歸藏朝夕思慮謀以地塋幸而天
相厥猷得獲吉壤于戴相塢其所猷為雖智謀之士亦罕能及時人皆
曰汪孺人真女丈夫也以至元十七年己卯二月十五日午時生至正
六年丙戌八月初一日午時歿孺人之懿行媿媿宜表之以文次曰於
戲孺人容德兼媿配彼君子蘋蘩供祀於戲孺人良人先違誓撫諸孤
克廣茲基於戲孺人吉壤是求厝彼先靈天相厥猷厥謀既遂孰云弗
臧宜爾曾孫百世勿忘

祭 祖妣補一孺人汪氏墓文

維大明正統二年歲在丁巳二月辛酉朔越二十有三日癸未奉祭孫
余志陽惟吾 祖妣天性貞良名門毓秀端一誠莊相輔吾 祖贊畫
多方未登五秩遽爾居孺克襄大事視先有光殯兩重之尊長卜宅兆
之允臧培根源之深厚開後世之京昌追思恩德其何敢忘念自城之
寫遠恨拜掃之跡荒羅公私之紛撓徒感激于衷腸茲逢春暮屆此辰
良緣偕子姪五世后行潔牲于俎崇酒于觴敬陳一奠羅拜墓陽 尊
魂如在來格來嘗尚饗

補一汪鶴人世家

汪濬初任虔州通判再任長沙太守三任太常寺卿由婺源迴嶺遷休寧虞芮鄉趨化里汪邨又曰龍溪出越國公華後父汪清字清軒母陳氏子汪義汪立祖華字信甫生端平甲午中戊午科戊辰任杭州富陽縣主學祖母胡氏曾祖文質字彬然曾祖母方氏補一二程氏孺人出同里充下其程氏原在本里一保下干居住復遷充下箭園父名程觀護

九世祖山長公小傳

山長府君諱震祖字元啟以字行元大德丁未六月二十六日生至正
已丑以明經舉充明經書院山長尋以世亂謝去隱不復仕歲丁酉我
聖祖為吳國公戊戌遣兵下婺源府君陳狀分院當事者義之優以廩
膳為給榜禁飭侵掠居民恃以無擾晚年營別墅于理源之葉家塢題
曰仁齋因以為號洪武壬戌十二月二十七日卒即葬別墅之後山今
所謂後山壟者是也元配胡孺人系出東源生同歲二月初七日歿洪
武庚午九月十七日葬裏坑口東邊聞之長老言孺人故殯鄞村住後
自人材府君徙理源與公壽公約分治王父母墓越兩世不相聞公壽
之裔徙孺人他所以其墓為宅理源聞而詰之漫指今處以硃漆棺木

為信近闕故券載舊穴有水聽公壽擇地改塋則當時徙墓為宜特未
之會同理源耳又娶祝氏傳云並嫡生卒無攷塋下塢均胡孺人子五
人閩陽隸成籍傳子義得公文皆無傳賓陽無後其弟昭陽等立震七
之孫僧同為後僧同以兄絕歸宗又立震四之孫公藝為後公藝既受
產復歸所生賓陽猶無後也昭陽為三溪裔景陽為理源裔載陽傳子
公敬以事被籍死于京祝孺人子二人復陽之後繼同猶克用之嗣源
也知陽五世後曰焙曰乞嗆母再適焙贅而鰥乞從再適姓不復通籍
側室吳氏子天祺出贅休寧益府君之子八人而惟三溪理源稱並盛
云按舊譜載府君為山長時白公讓知本州事薦之陞沈州路通判今
攷禁戢撫安二榜一則曰據前明經書院山長某呈一則曰據前明
經書院山長體祭未睹所謂路判銜者又白公讓以壬寅知本州甲辰
死信賊之難是時徽池並入版圖改路為府不宜復稱路判且通判郡
秩似非屬州可薦擢者今山長告身見存而路判無文可據或云擢而
未受然曰路判當在戊戌以前不應又為白公薦也近見東山寺檀樾
神位書明經書院山長仁齋余公為人材府君所立府君以孫亦社當
不誤明經書院正德間重脩祀胡雲峯先炳文以府君配迨萬曆辛巳
故相張居正盡毀天下書院祀遂廢

贊曰學不必達要之修義也不必顯要之適志學道教人一擅三世
民不被兵今受其賜

九世祖震一府君行實

府君諱元啟字元起又名震祖號仁齋行震一補一公之家嗣也元成宗大德丁未六月二十六日卯時生性敏捷自幼嗜學總角時善屬文弱冠所立已卓通諸經尤工春秋平居衣冠整肅動靜語默師法古人巧利鄙詐之士聞風而意消順帝至正己丑授明經書院山長為教率先行義後課試學者翕然服之本州白公謙論其賢薦之陞池州路判方爾德化及民而值世擾攘遂棄官歸不復出去舊廬二里曰理源山迴谷窈人迹不到關山字題曰仁齋深居簡出為治心脩道之學因其所自號學者稱之曰仁齋先生黔南程文贈府君仁齋詩曰脫却江湖萬里塵歸尋安宅托閑人光陰自昔知多謬事業從今始覺真本向

考亭為後進豈期涑水是前身

每見府君言勸教中樂地春無限底用似君實故及之

千金更買鄰太古王埜翁題府君讚曰兩山夾峙率湖之巔三川迴合

鄱浙之源篤生君子靈秀攸宗族稱孝鄉黨稱賢明經總教器識率

先判治德化民具爾瞻兵革以起陵谷以遷見幾而作令終克全國朝

洪武壬戌十一月二十七日亥時卒享年七十有六洪武庚午年葬本

里三保理源葉家壩住後亥山已向屢脩郡邑志俱載宦業列

見婺源縣志

配夫人胡氏諱福德出清華東源胡尚賓公女有淑德元成宗大德丁

未三月初七日戌時生國朝洪武庚午九月十一日子時沒享年八十

有四原塋本里三保鄣村住基內改塋理源口東邊艮山坤向生子五

人閏陽賓陽昭陽景陽載陽再娶孀人祝氏諱怡娘源下筠均生

子二人復陽知陽又納側室吳氏生子一人天祺

薦辟傳

邑志公傳

余元啟字元起初名震祖沱川人性敏捷自幼嗜學總角善屬文弱冠所立已卓通諸經尤工于春秋平居衣冠整肅動靜語默師法古人巧利鄙詐之士聞風而意消至正九年授明經書院山長為教率先行義後課試學者翕然服之本州知州白公諗其賢薦之陞池州路判值世擾攘遂棄官歸不復出去舊廬二里曰理源山迴谷窈人迹不到闢山宇題曰仁齋學者稱之曰仁齋先生年七十有六

選舉傳 邑志

余元啟字晨起沱川人舉文學授明經書院山長與胡雲峯上下其議
論知州白公薦之擢池州路行

震一公初任明經書院山長劄付

皇帝聖旨裏浙東道宣慰使司同知副都元帥兼徽州路總管今擬發
源州儒人余元啟充本路明經書院山長勾當除已舉申
江浙等處行中書省照驗外所有劄付須議出給者

右劄付徽州路明經書院山長余元啟准此

余元啟 印

宣慰使司同知 押

副都元帥 押

禁戰榜

皇帝聖旨

吳國公鈞旨江南等處行樞密院星源翼分院據前明經書院山長
余元啟狀呈見於秋源州十六都住坐耕田讀書資身教子誠恐
過徃軍人到於本家搔擾致使不能安生呈乞施行得此樞府除
已優給廩膳以資養道外合行出榜禁約來徃軍人毋得擾害敢
有違犯之人即仰呈院以憑處治須至榜諭者

右榜諭衆通知

榜禁約

印 十一 印 印 押

撫安榜

皇帝聖旨江南等處行樞密院星源翼分院見為守禦事已經招安婺
源州鄉都人民各安生業趁時耕種及戒飭頭目人等各守紀律
毋令軍人在鄉擾害於民今照得即日京方作興農務是時體知
槩管都分每遇軍人經過拖搶農夫負荷行李及以假火宿歇為
由到於居民之家需索酒食唬嚇老幼致使民不安業農失其時
深為未便除已差委前明經書院山長余元啟前去體察外合行
備榜曉諭本處農民趁時耕種毋致荒廢田畝仍禁約一應過往
頭目軍士人等毋得拖拽農夫擾害於民敢有違犯仰所管官就
便批拿赴院以憑究問施行須議榜示者

右榜諭衆通知

榜禁約

印 卷 印 押

仁齋翁公書序

初吾成立早失汝大父值鄉俗薄惡所承基業幾罷于訟繼而連歷兵
革陵谷變遷吾本分守已辛勤積累克完舊遺所增倍蓰皆由吾祖宗
積德所致今年登耄耄理宜立帳勾分各自伏解庶無偏徇汝兄弟雖
見成立當念連枝之同氣持九矢以為心尤宜知河海之起于細流太
華之積于培塿披克前業視吾有光是至望也汝曹勉之

仁齋公批長孫田約

吾諸孫中汝為長而能知溫清之禮朝暮在側其意可嘉今析產與汝
伯兄弟就撥本都一保晚田五畝租五十秤係木字一百三號土名東
坑口佃人程盈付汝交租管業聊示吾含飭之愛汝其體之

洪武十四年八月

吉日

祖余仁齋

押

代書親眷項宗敬

押

仁齋公批立繼孫約

復一郎汝戶役繁重隻身難以支撐尚未親出見得知親眷庶廷佐宅
又見第三子其家襁褓中缺人乳如寔有遺棄之行汝兄弟中子姪又
少見稟瀆本宗尊長知會汝可托人覓為新嗣顧人乳養于
律無違可信聽

洪武十一年九月

日父余仁齋 押 付復一郎收
尊長

余伯資 押

余原善 押

余以和 押

送池州判官余君歸仁齋

黟南程文

脫却江湖萬里塵。歸尋安宅托閑人。
光陰自昔知多謬。事業從今覺始真。
本向考亭為後進。豈期涑水是前身。
教中樂地春無限。底用千金更買鄰。

送余君仁齋川東歸隱序

龍虎山自漢天師垂教以來其後歲以正七十月之望為醮以金籙授四方之好善者洪武十三年正月徽婺源之上余君仁齋實來玄壇虔恭與醮魏冠盛服為衆士首既竣事乃與宮之主者倪尊師季高汪尊師伯通肆觀乎山水之間指而歎曰是間也群山繚外如城大溪橫陳如白虹而仙巖束其委為峽為隘其中風氣愈益完固而地勢廣衍其為仙者之都會固定于開闢時矣宜乎張氏世其教千數百年于茲予不知夫造化之奇如此哉雖然予所居後為高湖山前為張公山兩山之巔各出龍井清溪走其下分為三川兩山之奇峰秀岬率披寫于澄泓之間浮藍駭綠春榮秋斂變態非一而予之居適當川之東其地亦

曰川東予有孫六人或携杖相從或左扶右掖臨淵觀魚咏歌相羊亦足自適安得善画者圖之以厚其歸且不忘大山之自尊師乃命其徒俞昱方作川東歸隱圖贈之後聞仁齋過予草堂徵文序之予曰余君所慕茲山之勝君既攬結之已復佩金錄而歸則將益而躋乎上壽已矧聞君乃徽之望族嘗為前池州路判德及于民也久夫德及于民也久則將慶流于後之人矣慶流于後之人尚將携曾玄以遊而未已也君異時觀予前所述則茲山不違其自驗予後所陳當于為善而益信七十病叟會稽夏衍序

新安余仁齋川東歸隱圖序

川東歸隱圖者上清俞昱方所作也十有三年春正月新安余仁齋氏以清淨心崇玄虛教不受千金之貲詣玄壇為四方群信首既卒事之明日戒行李歸昱方遂為圖以餞行一日適已來會即問坐定問道所從徃因歷言之袖出歸隱圖示予且屬序之予玩之久愛其高湖鄣嶽兩峯玉立並峙丹崖紫壁與翠竹碧梧交映于下穹然不復知有人間世也君徃矣暇日釣遊得浦魚興以歸隱趣歌歸隱詩凝神定氣燕坐寂然樂夫川上之樂而保其所處之正也予雖未獲造君之堂然觀斯圖亦可得位致之萬一矣矧徽衢雄府皆士君子遊宦之區異時清風一道則必首訪川東歸隱翁焉予言有徵君其識之洪廷宣伯藩謹序

前... 山... 東... 歸... 隱... 圖... 詩... 觀... 宇... 一... 水... 一... 山... 生... 一... 春... 三... 間... 老... 屋... 靜... 無... 塵... 歸... 時... 好... 向... 溪... 翁... 道... 不... 是... 幽... 潺... 湲... 要... 惱... 人... 又... 倪... 崇... 本... 題... 余... 仁... 齋... 川... 東... 歸... 隱... 圖... 詩... 觀... 宇... 一... 水... 一... 山... 生... 一... 春... 三... 間... 老... 屋... 靜... 無... 塵... 歸... 時... 好... 向... 溪... 翁... 道... 不... 是... 幽... 潺... 湲... 要... 惱... 人... 又... 倪... 崇... 本...

題余仁齋川東歸隱圖詩

觀宇

一水一山生一春三間老屋靜無塵歸時好向溪翁道不是幽潺湲要惱人

又

倪崇本

亭、高湖峯下有隱者居川谷互回合形勝清有餘昔者兵革起得無
為木疎自非家慶遠子孫能晏如藍輦忽東來飄、駐玄都清夜降仙
真焚香滿空虛稽首服要妙、執壤瑤書迴車倏言邁林鳥相驚呼舊
隱碧雲外春溪芳草初留之不可得寫此翰墨圖我志倦奔走題詩幽
興俱何當清澗尾相與結茅廬

謹按六世祖府君治春秋經以才識聞于時至正九年為明經書院山
長知州白公薦之再任池州府判知天下將亂棄官還故山舊廬三里
曰理源山迴谷窈人迹不到闢山宇題曰仁齋深居簡出為治心脩身
之學復托符錄以自污用保令終云七世裔孫瑩謹跋

直方堂譜曰川東歸隱圖出真人張宇初所贈山長府君故舉明經與
胡仲虎諸賢上下其議論為脩身理性之學而不愛重賞主盟都壇無
亦時當刑亂重足觸網思有託而逃焉者乎八世孫懋學識

展仁齋府君歸隱圖釋菜文

七世孫瑩

神必有所依也公之神不在茲圖耶展茲圖不如見公耶張公在西高
湖在東公宅處乎其中川故川也林故林也隱故隱也鬱鬱葱葱滿腔
惻隱吾默與之神通是用釋菜以寫追崇適也覺山洪子東郭鄒公自
冲玄而言歸也亦有若茲圖者于歸之從乎苟有得于神山之槩者吾
不敢問其人之同不同

元池州路判仁齋先生像贊

太古王桎翁邑人

兩山夾峙率湖之巔三川迴合鄱浙之源篤生君子靈秀攸兼宗族稱
孝鄉黨稱賢明經總教器識率先判治德化民具爾瞻其革以起陵谷
以遷見幾而作令終克全

始遷理源十世祖閏五公小傳

竹居府君諱景陽字以和號鈍齋善春秋學旁通郭氏書去山長府君別墅百步而徙築焉環植以竹復自號曰竹石時登太平歲節率里族少年歡醜父子更酬翁壻迭酢斯一時之盛哉子姓因之二百餘年不廢今英俊會是也然祇成故事矣為文章質而不俚散逸不多見覽所著譜牒清明諸序直抒己意不事雕琢蓋治世之文也洪武丁丑以鄉人訟累逮繫赴京得自直歸了無喜愠生元至元丁丑七月初五日沒永樂戊子四月十五日塋居畔青龍頭今子姓掘地為基積薪其上所存者僅一坏耳元配張孺人生歿無攷塋石會外繼配程孺人系出黟縣而徙本里之後溪生元至正丙戌正月二十三日沒永樂己亥二月

二十一日葬與府君同兆張孺人無子而程孺人子公順女壻詹克成
俞孟祺側室程氏子本立俞氏子公恕本立為郡掾歿葬西郭外公恕
生子定新而皆無傳

贊曰術可擇乎禮義詩書此可擇乎理源竹居慶自心詔豈以地致
縲紲非辜內省何憤

始遷理源十世祖閔五府君行實

府君諱景陽字以和號鈍齋別號竹居行閔五仁齋公之四子也元順
帝至元三年丁丑七月初五日子時性聰慧好讀書及長能文博通經
史國朝洪武乙亥邑宰羅仲睦以明經舉辭不就樂理源之勝遂徙居
焉公府輸納或以時辦故里胥無及門者而儒生有過則倒屣出迎如
恐不及常以詩酒自娛間飲半酣則擊節放歌無思慮其樂陶真
柴桑氏之流歟洪武丁丑以鄉人訟累子壻偕女械繫至京恬無憂懼
鄉人咸驚駭失色乃曰有罪無罪在我而已不過累一行耳既而抵京
執政者舉直錯枉果如其言子父完聚以還君子謂其料事如燭照而
數計無毫髮之爽其死見之明顯如此永樂戊子四月十五巳時不疾

而逝。墓本里三保理源皮愠址。即住畔兌山卯向。配孺人張氏諱真。年
卒。不改。墓石會外。繼配孺人程氏諱福弟。出黟縣蔡村。程以佑公女。元
順帝至正丙戌正月二十三日戌時生。有婦道優于內助。永樂己亥二
月二十一日戌時歿。合葬府君穴右。子一人公順。女二。長鳳。適十四都
詹成翁。次佛。適本里黃村俞孟琪。側室程氏子一人。本立。俞氏子一人。
公怒。

追述理源始遷祖閏五公行實

按舊譜小傳。公性聰慧。博通經史。善屬文。邑宰嘗以明經舉。辭不就。樂
理源之勝。遂徙居焉。公府輸納咸以時辦。故里胥無及門者。而儒生有
過。則倒屣出迎。如恐不及。嘗以詩酒自娛。夫舊譜作于正統乙丑。去公
之世未遠也。即是固有可據。善蚤歲。又嘗得先大父保竹公謂公生當
胡元運末。及國初草創之際。鄉人率以智力相雄。長公之擇居理源。
固有取于山川迴環壤土肥沃。良亦厭紛亂而慕幽閒。且當時居民數
室。皆勤本務實。故樂與相友。結廬數楹。退焉靜脩。敦孝友。崇禮節。遇強
暴。每應以讓。讓未嘗較錙銖。而構釁隙。歲時祈禱宴會。則懽然為鄉族
倡。暇日。手不釋卷。故多所著述。尤好佳山水。里中凡形勝之地。輒有業

焉則夫公之所貽謀者不在乎貲產之富而在于擇里處仁之慎不在
于聲望之雄而在于陰德冥冥之積古所謂哲人善士者非耶所著多
不存藁間見家乘者僅百之一且誦公之文而氣象亦有可想沒世之
後未有誌傳之詳則公之隱德孰從而知之且公為理源始遷祖也今
之基業實自公始功德所在亦自有不容泯者乃因得所考聞而追述
如此云

嘉靖乙巳夏四月既望六世孫善謹述

追述始遷理源五世祖考國五府君行實

公理源始遷祖也今之基業實自公始其功德惜未有能誌之者基嘗
得于祖父之傳聞及稽諸小譜敢追述之曰公性聰慧博通經史善屬
文邑宰嘗以明經舉辭不就公生當元末國初之際鄉人率以智力相
雄長公乃擇居理源固有取于山川之環聚良亦厭紛亂而慕幽閒且
當時居民數室皆勤本務實故樂相與友結廬數楹退焉靜脩敦孝友
崇禮節遇強暴每以謙讓應之未嘗較錙銖而構釁隙歲時祈禱宴會
則懽然為鄉族倡嘗以詩酒自娛公府輸納咸以時辦故里胥無及門
而儒生有過之者則倒屣出迎如恐不及暇日子不釋卷故多所著述
但不存稿間見于家乘者僅百之一耳誦公之文亦可想見其為人矣

尤好佳山水凡里中形勝之地輒有業焉則夫公之所貽謀者不在乎
貲產之富而在乎擇里之慎不在乎聲望之雄而在乎陰德之積古所
謂哲人善士者非耶

六世孫基謹識

十一世祖人材公小傳

人材府君諱公順字德從號湖山清隱又號竹隱晚號川東老人洪武
二十九年以人材舉奉勅斬黃吉安等處公幹尋以母老疏乞歸養
服闋復辟不起事具張果所著川東老人傳中生勝國丙午九月二十
一日歿正統甲子正月初二日配施孺人裔出施村段鎮撫邦珉公女
生洪武己酉五月二十四日歿宣德己酉四月二十七日與府君合葬
宅後孺人生子定禮不育為府君納二側室曰黃氏子定富定安曰李
氏子定義定廣孺人所自出者女五仙壻施村施仕善細壻甲道張文
華傳府君果者其子也止壻休張源方淑清陰德壻施村施復興南壻
休坑口汪思靖府君之歸女也厚之田與子等其後亦與余宗並盛定

安定義俱不傳。富公傳子五曰梧曰棣曰棣曰栢曰柟。是為上房。廣公傳子三曰栢曰相曰楷。是為下房。富公多本實。故其後多力本。迺其聚指視下房才三之一耳。李氏墓石會外黃氏墓大圓坦。歲時合祀於其寢。其墓則所生之裔各自標掛云。

贊曰：出則捧檄，入則陳情。猗與人材，忠孝令名。維木有樛，維江有汜。猗與孺人，疇謂非子。於焉芥堂，於焉盟裸。歲儼遺容，有嚴萃渙。公女

川東老人余公傳

川東老人者，西沱川余公之別號也。諱公順，字德從，行基一。曾祖伯吳，祖仁齋，父以和，世以詩書自守。隱德弗耀。公性穎悟，涉獵書史，通達時變。以孝謹聞于鄉里。洪武二十九年，詔天下山林巖穴懷材抱德之士，令舉薦以備任用。有司以公應詔。公以母老弗屑就。有司逼迫弗容，固辭乃就道。赴部銓衡，以時務策試中式。尋令持節四方，其所至俱以能聲。于是將任以大用，公以母老念之，弗置。遂抗章陳情，得以親終服滿復用之。命歸養。于是朝夕得以供滌灑，起居得以奉定省，怡愉于膝下，以叙天倫之樂。侍母終年，克盡孝道。其于祭祭之禮，一盡其誠。丁艱，服闋，部檄復徵。公以疾辭，弗起。閑居，惟以詩酒自娛。或登高

而望遠或濯滄海以自潔賢客過從觴詠終日承先人之厚產家足而裕
無驕矜態周人之急惟恐弗及恤人之孤免勉其成性行類如此娶孺
人施村施邦珉女諱柔德乃吾高祖季華公之外孫女也有懿行粗通
孝經語孟閨明之內婦德母儀咸有成則不幸生子不育有女五長曰
仙配施村施士善次曰細則吾母也三曰祉適休寧張源方淑清四曰
陰適施村施復興五曰南適休寧坑口汪思靖皆故家子也孺人乃與
公曰不孝有三無後為大勸納側室遂納黃氏生子定富又納李氏生
子定廣共十孫梧榛檉移杞棣相調棹楷公一日疾作家人咸聚乃曰
今吾子孫滿前皆先孺人之德也吾瞑目地下無憾矣言既而逝時正
統甲子正月二日也公生元至正二十六年丙午九月二十一日子時

享年七十有九孺人生洪武己酉五月二十四日未時先公十六年卒
享年六十有一合塋理源本宅住後吾則公之外孫也承公之貲產甚
厚感公之教育良深惟懼公之潛德久而湮沒故為之傳以示久遠不
忘之意云

明正統九年甲子歲菊月下澣吉外孫張果彥實謹傳

十一世祖順一府君行實

府君諱公順字德從號湖山甫隱又號竹隱晚號川東老人行順一鈍齋公之嫡子也元順帝至正丙午九月二十一日子時生少淳敏有學行通達時變以孝謹聞于鄉里洪武丙子年詔天下山林巖穴懷材抱德之士令舉薦以備任用有司以府君應詔府君以親老不悅就有司逼迫弗容固辭乃就遁赴部銓衡以時務策試中式尋奉旨令持節蘄黃公幹其所至俱以能聲下_是將任以大用府君以親老念弗置遂抗章陳情得以親終服滿復用之命歸養于是朝夕得以供滌灑起居得以奉定省怡愉叙天倫之樂居父母喪哀毀踰禮啜糜飲水三日不進鹽菜旦夕哭臨不輟安葬本居廬左置木榻藁席于中

卧則枕塊日則號泣進膳如是者三閱寒暑不櫛沐不留意家事丁艱服闕部檄復徵府君以疾辭弗起家居猶縞衣糲食每遇諱日輒嗚咽流涕承先人之厚產家足而裕無驕矜態周人之急如恐不及恤人之孤黿勉其成性行類如此正統甲子二上月初二日辰時卒塋理源本宅住後黃蛇聽鴿形唐山甲向配孺人施氏諱柔德出施村鎮撫施國遠公女洪武己酉五月二十四日未時生有懿行粗通孝經語孟閨門之內婦道母儀咸有成則宣德己酉四月二十七日戌時沒塋公穴右子一定禮女五先^長女適施村施善奴次細女適_口道張文華三住女適休寧張源方淑清四陰德適施村施復興五南適休寧坑口汪思靖側室黃氏諱隆洪武丙辰十月二十五日子時生正統丁巳十二月初七日酉時沒塋戴相塢口大圓坦子一定富定安李氏諱社女洪武己未八月初七日申時生正統甲子九月十二日子時沒塋本源口石會山即廟山飛鳳冲霄形亥山己向子二定美定廣六一多適本里克頭張文彬胡氏諱密洪武庚午十二月初十日寅時生沒塋不放女一庶適休寧汪村汪綱

壽竹隱余公華旦序

余忝掌教婺源邑庠邑之右族張文華氏子果以俊秀之資從遊為弟子員講授之暇從容請曰生之外祖余公順氏是歲秋九月壽臻七袞敢蘄先生之言以慶之余躍然而喜曰人子之于親天屬之愛也今生之于外祖而能致其慶是受母之推而能知所重矣抑亦體父文華之心而無所戾歟余謂初度人生之華旦也桑弧蓬矢以射四方終身之福祉基焉凡于其所尊所親者必有忱履之獻觴豆之奉禮也兼是二者而重以詞章即彌文矣公順公世居邑北之沱川故家也鍾扶輿磅礴之秀維嶽降神生而穎異余悉其為人氣厚而色溫恭慎而不伐彬彬文質綽有長者風洪武中嘗以求賢舉公慨然有志為時用誦皇華

持使節歷覽大藩周爰執事俾各有攸濟民咸德之越教載以母老陳
情得歸終養若公者可謂忠孝兩全矣于是開三徑種菊松延白雲為
升堂之侶結清風為入室之賓夷猶于澗谷間良朋勝友談論古
今者無虛日茲逢二萬五千數雖曰百稀之年然視公之童顏鶴髮精
采華如自有以異于稠人矣矧公之修身齊家好善惡惡而皆克盡其
在我者故其得于天者厚曰壽曰富而公莫不咸備焉是日也南極呈
祥東籬菊綻笙歌鼎沸寶篆香浮悅履以獻誠觴豆以奉壽綵戲堂前
若有桂子蘭孫之森如坦腹東床者此文獻之家之後裔備斯教者之
榮柔弧初志于是而徵終身福祉于是而基又非人生至樂之辰乎詩
曰為此春酒以介眉壽又曰既醉以酒既飽以德公順公有焉予因張
生之請故不辭而書此以慶之殆云仁者壽詎不信歟婺源儒學教諭

吳寬書

壽竹隱翁公七莖華旦詩

延陵賢裔光儒官。峽倒詞源好筆端。昨寫張生壽翁卷。珠聯星綵氣鉅寒。

張生舅氏亦云奇。孝感年高邁古稀。歷使華誰不戀。却拋利祿侍慈闈。

文淵閣修書官奉訓大夫前無為州守青原鄒以信書于東山草堂

欽差人材官余公順言安府具結呈

吉安府

呈近抄蒙

刑部金字玖拾玖號勘合批差人材余公順到府為江德民有胡黨屬事仰照勘胡巽初于何年月日何衙門某字號為胡黨抄提有無男兒是何名字戶下人口家財何衙門交收胡以清與巽初是否同族親屬胡以清何年月日為提取有無在家病故明白回報蒙此即日行據廬陵縣申備里長胡郁彰等供結胡巽初原係柒拾柒都民有男胡子同報籍在陸拾柒都寄居洪武二十一年間蒙刑部差錦衣衛力士石玘等到縣將本戶抄解去訖胡以清即胡一清

于遠年間病故戶絕與吳初不係宗族亦不曾為事胡巽初亦洪武二
十年間為胡奴仔告黨逆事蒙

都察院差興武衛旗軍孫彥良等將本戶全家人口抄提赴院去訖家
財房屋給與原告胡奴仔收用申結列府除將府縣官吏里老人等保
結申繳外開生具呈施行須至呈者

右具

呈

洪武三十年三月

日吉安府知府王從信

經歷趙縉

知事蔣驥

典史饒與林

廬陵縣執結

廬陵縣縣丞吳敏等今于

欽差官處與訖甘限為江德民首當屏事甘限本月

日 時將六

十七都胡巽初等該管里老隣佑人等到官眼同審勘取訖執結文狀

四報不致扶捏作弊如共甘罪無詞甘限是實

洪武三十年三月

日

廬陵縣縣丞吳敏

典史劉睡生

印

廬陵縣甘限

吉安府廬陵縣縣丞吳敏等今于

欽差人材處為甘限為江德民首正馬屬事甘限本月

日 時責

將六十七都里老黃文貴等照勘胡巽初胡以清等明白結不致違

悞如違一體施行甘罪無詞甘限是實

洪武三十年三月

印

日

廬陵縣縣丞吳敏押

典史劉睡生

婺源縣志載薦辟

國朝余公順字德從沱川人
洪武初以人材辟親老乞歸終養遂不起
號竹隱

祭順一公文

子婿汪思靖

維

大明正統九年歲在甲子二月辛巳朔越二十有五日以孝婿汪思靖孝甥讓及內外孝眷等敬以清酌素饌之奠百拜生祭于

外舅新安郡順一余公之柩前拭淚而言曰

嗚呼外舅惟天湛徹資質溫醇稟湖山之清氣為沱谷之高人少居鄉黨和樂恂恂壯膺薦剡展步金門觀國之光為王作賓公時在朝侃侃闔服勞王事持節江濱出使報命帝勞忠勤公之操守邁乎等倫慨慕昔賢明哲保身急流勇退拜表楓宸乞歸田里俯伏天闕上帝曰疇咨宜為廷臣爾母既疾賜爾養親時公錦歸私第角

巾桂子蘭蓀藝。振。思靖不肖忝婚婚。姻辱公教誨。提命諄。滿
期公壽少奉晨昏。胡天不憖泰山其崩。今而已矣。夫復何云。茲當終
七薄奠一樽靈兮。有知來格來歆尚饗。

公順余公像贊

梧桐之資。江海之翁。風月態度。韻府心胸。不知者謂其拘而簡。知之者
樂其率而通。此其所以雍容乎林泉之適。而獲追趨乎貞各之蹤也耶。

又贊

山川毓秀。篤生斯人。實藥籠中之人物。為席上之奇珍。曾膺一鶚之薦。
觀光乎上國之賓。奉使內外。咸以能聞陳情。而歸養老母。優游乎以樂
天倫。或遨遊乎溪上。或尊酒以論六。真無懷氏之民。乃葛天氏之民也。

又贊

邑人孫

宸叔拱

甲道張中

三衢童文浩

容貌端嚴。衣冠濟楚。世業詩書。家繩簪組。榮膺鶚薦。名登天府。上疏陳
情。辭歸養母。奉晨昏于家庭。供甘旨于鼎俎。垂白髮以懽娛。着班衣而

戲舞眉壽屆七旬之八。景福全九疇之五。噫仕止行藏可謂從容而得其所者也。

順一孺人施氏像贊

甲道張果彦實

有德有言有容有工凜然內則書之。坦通輔佐君子咸適其中。是以克全于婦道。有衛莊姜之餘風也歟。

十二世祖愛竹公小傳

愛竹府君諱定廣字良大號愛竹。偶儻好義嘗領區賦長督率有方歲無後期伯氏貸教官緡完官賦其舍人來責逋伯氏無償也。府君視舍人色有厄為償其逋亟命輿舁之歸甫入舍而舍人就斃。是伯氏得無它而教官某亦亟稱府君之高義鄉人又嘖服先見焉。商某買府君木或以越界告商聞懼入金以償府君往視之曰界故是也。卻其償不受嘗質產於族人某後數年其子竊質券以還府君嚴拒之鄉人語曰宋人獻玉司成辭玉各全其寶府君有焉。輸賦金陵買妾還後竟歸之母家而不責其聘性跣跣跨一騎往來族里中博奕終日居前有上馬石鄉人猶曰焉石云府君既好施而又不問生計家稍就蝕瓶粟罄

者屢矣所居室必塗以漆几席什器必求精備晚年諸子森立克家力
穡故卒能復先日之所蝕且增闢焉生永樂辛卯十二月二十七日歿
成化癸巳正月初一日墓扶家塢配汪孺人系出休寧汪村處士思銘
之女聞之先世言府君淑帚千金孺人每佐以勤儉為鄰家治針指得
蒸飯必携歸乾之以待不殮其拮据捋茶類如此生同歲六月二十五
日歿成化丙午十一月初三日墓淡竹塢子男四榛移相楷女二壻城
西韓思鈺申道張聆榛字尚果有幹靈譽生宣德己酉年如顏子而沒
於疫配吳孺人裔出大連有女三人思為清華胡廣山坑杏孟桂順天
府判仁峯汪先生循者其中壻也孺人以二十八歲稱未亡人後三十
年而歿合葬庄前坦今墓克紹祠歲以清明祭掃不殊所生云移字尚
寧號味梅子三曰烜曰省曰裕相字尚賓號保竹亦子三曰焞曰煇曰
瑩弘治甲子鄉薦為廣昌縣令楷字尚正號友松亦子三曰焮曰耿曰
燧府君遺像舊藏效陳軒嘉靖乙卯燧于盜

贊曰行無詭隨心孰城府千金弗悞一介不取漆室之修乾構之遺
不有內政孰後之詒三十年前三十年後維子之賢實翁之厚

十二世祖廣二府君行實

府君諱定廣字良大號愛竹行廣二竹隱公之次子也永樂辛卯十二月二十七日辰時生平生好善老而彌篤財不苟取而樂施于人有鄰報公某處杉木被某商人越界侵伐公使人往視之商人懼出貲以謝罪公疑之復親往視所侵無多即舉商人所償價而還之商人遂對天跪拜以富貴昌大祝公之子孫而去有從子為里役借貸邑庠掌教錢後掌教令人取索公出已貲代之還且使僕者舁筭輿送之去復戒之勿竢其酒食亦勿他往當尋便抵家僕者既送至如命即返掌教家人晚暴卒欲與有言而弗能則此無妄之禍是公為之弭之也又有菴居老婦者就公募燈油公語家人即與之令亟去明日人報之曰庵居老

婦昨夕死矣則此老婦待歸死于庵是公之賜也公豈亦善風鑑乎又有族之子竊公先售于其父之田券還公公毅然却之家人或勸曰彼既還我受之何害公嗔之終不受易曰宋人獻玉司城辭玉各全其寶象曰以玉為寶徇于利也不貪于寶忘于義也公捐十百以與人乃子孫反增至鉅萬自今觀之公受報于天亦大矣為善不有徵哉成化癸巳正月初一日巳時卒葬三保扶象塢金牛脫柅形亥山巳向配孺人汪氏諱欽出休寧三十二都汪村汪思銘公女永樂辛卯二月二十五日巳時生有賢德懿行婦道母儀或書其職成化丙午十一月初三日寅時沒葬三保淡竹塢出水蓮花形又名五馬奔槽形辛山乙向子四人榛移相楷女二人長細奴適城西韓思鉅次婉奴適甲道張聆

追述曾祖愛竹府君行實

曾孫基

公豁達大度人也好馳馬不事聲利冠裳必敕取財不苟至于宮室器皿務求精備雖費不計也嘗為萬石長輸賦南京買一後竟還其母家或有告木客侵公山界者客懼償價謝罪公往山所視之尋召客而卻其價客欲增之公曰無關也吾何名而受子金乎相傳至今以為美談其義所當取者人亦不得而欺之喜擇交仁人善士凡好友之至于斯者靡不下榻投轄促膝論心故潯陽少恭吳公郁領鄉薦時以公加禮于其父造門拜公而公已即世矣及其被命督課湖廣復請衡藩大書克紹堂三字以贈皆公之遺也公少時與伯氏分財產拱手受成而畧無計較意及元區賦長徵稅于伯氏隨其戶所納而輸者雖

蓑衣帛被之類皆得准折公獨毅然微本色賴免賠費而已伯氏家貸
邑掌教錢舍人至索公招之飲退而語孺人曰視舍人將不久即計議
代還其錢而遣之且戒輿人曰急往返毋留宿送抵其家而舍人是夕
竟死則輿人已在途矣人咸嘖服公之明見而友于也嘗質券于族
人數年後族人子竊取質券來還公嚴拒之弗受鄉里皆稱之曰宋人
獻玉司城辭玉各全其實于公有焉公生為富家子個儻好義勇于為
善敝帚千金以至家道漸剝配汪孺人佐以勤儉每為鄰家治針指所
有餽遺悉乾而蓄之以待不時之需其拮据將茶類如此子四人力
田孝弟遂能恢復舊業而克大之書曰皇天無親與善為親又曰積善
之家必有餘慶其此之謂歟公之善行不能備考而詳紀之姑以所得
于前聞者敢追述其大畧云

追述曾祖良二府君行蹟

曾孫瑩

公故富家子也。好馳馬，不為聲利羈束。嘗為區賦長，娶妾京都美姬，以歸。後竟還其母，與伯氏分財產，拱手受成。秋毫無與，冠裳必執不苟取。分義當得者，人不得以欺負之。為區賦長時，伯氏隨納戶之輸，雖襤褸紙被瑣碎物，不問。公獨毅然微赤色，用得免賠費。客有售木者，或告侵公山界，木客懼償價。公乘騎往視，旋召其客，與之酒肉，以其價歸之。徐謂曰：「無關也。」鄉人至今以為美談。或時舉戒強暴者，伯氏假邑掌教錢，其舍人至索，公招而飲之。歸語孺人曰：「是舍人將不久，盍還其錢而遣之。」明日戒輿人曰：「爾急送舍人還，毋留宿。即返，其夕則舍人死矣。」而輿人已往。途人莫不歎公之明。室宇有序，器用精備。鄉人客于茲土者咸

加禮遇故少恭休陽吳公文盛公既領鄉書將以拜公而公已即世矣
嗚呼懿德令聞豈何從而備考之觀手澤之存聆鄉人之咳聊具其大
畧如此

送萬碩長余君定菑還鄉序

定廣婺源故家尚也其先世積德深遠後人得享其遺澤家世殷盛稅
糧甲于一鄉言行純篤人皆信服有司亦嘗敬其為巨室未嘗為之慢
易焉永樂間朝廷復立永克以理區之賦稅時定廣亦在其列方其
領是事也兢焉惟恐不能勝其責任之重勤于催督且能得寬猛之
宜緩急之序不侮鰥寡不畏強禦鰥寡者撫之綏之從容以待之強禦
者鋤之抑之或聞于官司以懲戒之不瘠民不暴橫不縱肆若此者良
由其讀書知禮公以處心廉以律已敬以奉上仁以愛下故也是以所
轄之區大小畢服其公強弱咸遵其語則一區之賦稅常為先足所以
不受逋慢之責者蓋由于此正統三年冬定廣董稅詣京師輸足完

歸道經于此其交友何氏宗漢等相率徵文以贈之夫世之所難莫難
于催租也先其時而徵之則一時未能致其足而徵之則過其時及其時
而徵之則一時未能致其足矧人心之不古莫能盡趨事赴公之心而
致愆期者多矣惟定廣能易人之所難而人之信服之者衆以故先足
而獲上官之敬則過人遠矣今而歸也唱隨諧琴瑟之韻友于致墳篋
之和抵于家也姻賓趨慶樂叙天倫公事既完安于無事孰不以為美
也尚祈來歲亦若茲云勗哉

正統三年戊午歲冬十二月吉日
賜同進士出身行人司行人新喻張韞書

祭良大公文

淵源詹功永

惟公性天仁義心地溫良德崇業廣智圓行方通文達理扶傾抑強名
聞朝野志在廊廟無驕無諂有紀有綱齊家人服敬禮琴瑟在御
蘭桂盈堂宜享遐齡遽返仙鄉訃音忽至舉家驚惶嗚呼東風峭兮
動我悲傷瓜葛零落分裂我肝腸螟蛉猶子兮代奠一觴靈其鑒誠兮
來格來嘗

祭外舅愛竹余公文

子婿張 聆

惟公鍾山川之秀，瑞盛時之英。持心忠厚，處事和平。為鄉閭之領袖，作後學之儀刑。悉心戶役，處困而亨。暇則留心書史，閒時道藝。棋枰也，聞詩聞禮也。多藝多能，屋潤而無驕。無諂謀，猷而不伐。不矜，誠人中之表。表乃鉄中之錚。正宜于北堂之上，以享于遐齡。胡天不仁，疾苦來膺。弗豫三月之久，藥醫祈禱難憑。竟遊仙苑，慟哭奚勝。聆叨居半子，每沐恩情，期百年之奉教，以啓予之不明。弗如我願，未獲終始。于是乎法程嗚呼，草木之枯也。有時而榮，日月之晦也。有時而盈，惟公之逝也。誠萬載之長行人，咸于公之逝也。而為公痛驚，聆謂公之逝也。而無愧于冥冥。喜公三子同氣，同聲。四孫拔秀，似蘭斯馨。皆善繼而善述，將大振其

家庭人謂公之死而有憾。聆謂公之死而猶生。輻車既駕，藁表心誠。一樽相餞，兩淚交傾。而今而後，何處論情。靈其有知，歎此一觥尚饗。

明處士愛竹余公象贊

德望之懿如珪如璋，威儀之肅烈日秋霜。壯志江湖為萬頃，長晚樂田園著型鄉黨。於昭此公，古人之儔。子孫京昌慶澤之流。賜進士第，判順天府事。孫婿仁峯汪循拜書。

慶余母汪孺人壽域圖詩序

太師徽國文公先生十世孫朱江氏為余母孺人之甥壻以孺人六月二十有五日生之辰數周花甲又進十年矣杜詩有云人生七十古來稀豈不可以深喜而且賀耶於是命画史寫瑤池王母慶壽圖徵士大夫詩若干篇復請予文以并諸首江之意以謂厥內之賢皆由孺人所出之賢故加意孺人之壽焉孺人早毓秀于休陽鉅姓汪氏幽閑貞靜謹守閨門及笄擇配於婺之沔峯名闕余公定廣事舅姑有禮相夫君有道內助勤儉以致家產豐饒延賓待客之需不必截髮而自然備具尤尚精潔鄉閭咸稱其賢生子三人長曰移仲曰相季曰楷俱讀書尚禮孝友怡心聿脩厥德不辱祖考之風生女二人長配城西士人韓

思鉅即灶之內火也。孫勇繁衍繩。蟄。皆有志於大成器者也。孺人
久失所天，獨居閨內，晨昏甘旨之養，則有賢子承歡于膝下，其心無憂
也。歲時伏臘，一有賢女往壻侍奉于闈庭，其心何憂乎？夫心無憂，則有
樂而一身和矣。下而若子孫若女，孝順則有恩而家和矣。吁！一身和一
家和，以和召和，吉祥生矣。此孺人所以壽之長也。是以出道學之儒族
素家庭之遺訓，克敦親之義，弗忘室家之恩，故孝之集詩，天錫其壽
之高，如山如阜，不待予輩詩文之祝，以孺人之賢而有德也。德者集和
之基，得壽之本也。彼百圍之木，膏液內涸，然後風得而折。未有根本
固而不先發生之者，能弗顛而覆之乎？茲因灶請，遂書于詩圖之右。
皇明成化十六年歲次庚子鄉貢進士教掌婺源儒學事吉水袁亮書

壽萱堂記

世人好牡丹，以為花中之王。世人好海棠，以為花中之仙。有好茶藤而
目之為玉友者，彼皆顏色嬌妍，人爭愛之，而不知雖真傳金貼玉剪錦
綴翠，何有于我。星源余君尚寧，暨其仲尚斌、季尚正、樹萱于堂之北。心
酷愛之，因以名其堂。其女孫婚休寧汪氏子循，求記于予。予嘉余君昆
弟所好與常人殊，然亦未喻其名堂之意也。按本草，萱一名宜男，花鹿
葱，其號名也。其草味甘，令人好懽，忘憂。詩云：焉得諼草，言樹之背。韓昌
黎詩云：主婦治北堂，膳服適休戚。故後世即以萱堂稱人母壽。即願其
享遐齡于無疆之謂歟。汪生曰：然，余君之母孺人，即生宗人思銘公女。
幼賢淑，為父母所鍾愛，擇所宜歸，得余公良大，乃公順翁仲子，志行超

卓交結俊髦名重縉紳嚴御辟下蓄貨貨廣田宅積而能散孺人相助
有功生四子長尚果即生外舅既蚤世外姑吳氏執節弗二八孫曰烜
曰焞曰瑩曰煥曰耿曰恢曰焞曰燧咸俊秀奇偉孺人今年六月甲戌
躋七十初度猶康強無恙焉予曰既富而昌既壽而康雜佩羅帶榮于
金章紫綬鹿車竹輿麗于文軒丹轂孫子滿前亦不羨彼百官回班之
為貴也人生至樂無逾于此何事植萱以忘憂乎生曰然慈母之恩罔
極孝子之情無窮人蓋有以喬稱人父梓稱人子棠棣稱人兄弟者矣
余君託親于茲而欲其壽亦人子之心不容自己焉耳是日也陳輓北
堂端而坐余君偕仲季戲綵之餘跪而祝曰俾爾昌而大俾爾富而艾
萬有千歲眉壽無有害家婦偕衆婦供鮭之暇跪而祝曰俾爾熾而昌
俾爾壽而臧三壽作朋如岡如陵珠輝玉瑩諸孫繞膝誦高逵夫長眉
留桂綠丹臉寄顏紅之句燕賀遠近鵠立左右誦吳雨巖雖然上界作
官府不如平地作神仙之句而生之子敏亦能誦陸放翁維孫能伴大
翁嬉之句于階下懽聲滿堂瑞氣繞屋孺人把酒臨花心躍神怡此花
方脩延繁華清香翠影彼此暉映凝精會神人物都忘余君惟願此花
與大椿蟠桃同壽悠久而母長在堂歲惟壽于花前尤恐日月若流白
駒韞繫承顏盡懽不足此余君昆弟愛萱之意也予曰嘻盛矣余君昆
弟之心哉人子之于親固喜其年之盛尤懼其氣之衰固欲其壽之高
又慮其日之邁余君其知愛日之誠嗟乎彼名王于牡丹者役志驕奢
號仙于海棠者疲神虛玩納交于荼蘼者刻意浮素咸趨于顏色之陋

觀余君托物孝親之風能不感觸于心而羞惡乎無羞惡之心非人也
成化庚子夏六月既望

賜進士出身尚京吏科給事中

欽賜歸閭碧陶野史祈門汪直懋書

余母愛竹孺人汪氏墓誌

孺人諱銀休陽龍溪思銘公女幼有淑德年十八歸沱峯定廣余公克
全婦道生永樂辛卯沒成化丙午子四榛移相楷榛先孺人卒孫男九
江焯瑩焮耿恢焮燧裕曾孫六坊勤壘杜埕坎將以仲冬壬申塋于淡
竹塢先事命叙其實循榛婚也謹為之誌

皇明弘治己未歲仲冬既望

賜進士第知永嘉縣事休寧汪循撰

愛竹孺人汪氏像贊

容儀端淑蕙蘭之姿德性幽閑冰月之持善相其夫教成其子婦道母儀儷昭駢美於昭女宗福祿攸降淮水不竭惟德之豐
賜進士第與順天府事孫婿仁峯汪循拜書



